

Hichtoire di cainton di Jura poi J-M. Moine

Doujieme paitchie : dâs 1947 djainqu' â 23 de djuîn 1974, è y é in probyème dains l' Jura

1947, l'aiffaire Moeckli	Po rempiaicie in biernois consayie qu' ât moûe, l' biernois govèrnement bote en d'vaint ci Georges Moeckli qu' é l' malhèye d'être jurassien, pe d' jâsaie l' fraînçais. Yun d' ces bons biernois consayies trove que ç'te piaice ât trop împoétchainne po lai bèyie en in romand consayie. 2000 dgens que n' sont p' daicoûe d'aivô Bierne s' raissembyant è D'lémont.
2 d' octobre 1947	În comitè d' defeïnse di Jura ât botè chus pie, ç' ât l' Comitè d' Môtie que d'mainde brâment d' tchôses â biernois govèrnement.
1948	Ci Daniel Charpillot bote en piaice l'Raissembyement jurassien qu' tire d' lai meinme sen qu' le Comitè d' Môtie.
1949	L' biernois govèrnement r'bousse les d'maindes di Comitè d' Môtie. Mains è sanne faire quèques conchêchions.
1950	Les Autoritès di cainton d' Bierne aint pavou qu' âtche de croûeye s' pèsseuche dains l' Jura. Êlles prepojant d' vôtâie po r'coégnâtre qu' è y é in jurassien peupye pe qu' les almoûesse è fraînçaise landyes sont égâs. L' Jura aicchèpte ç'te révijion d' lai conchituchion poi 20526 vòues contre 1120. L' véye cainton dit tot djeûte qu' 'èl ât d' aiccoûe.
1951	L' biernois govèrnement r'coégnât l' jurassien draipé. Ç' ât âchi lai fin di Comitè d' Môtie.
1952	En lai Fête di peupye è D'lémont, 8000 dgens d'maindant in vôte chus lai chupratè di Jura. D' enne âtre sen, enne âtre rotte de dgens que r'fujant lai chupratè di Jura, s' raissembyant dôs l' nom d' U.P.J. (Union des patriotes jurassiens).
1957	L' premie d' sèptembre, è D'lémont, 30000 dgens déchidant d' laincie enne lattre-d'mainde (initiative) dains tot l' cainton, po qu' an poéyeuche botaie, pus taïd, in vôte chus pie.
1959	Lai lattre-d'mainde feut singnè poi 24000 dgens (pus d' lai moitie des vôtaints di Jura). L' cîntche de djuyêt, l' vôte é yûe. Lai lattre-d'mainde ât r'fujè dains l' Jura poi 16000 « nian » contre 15000 « âye ». É veut fayait r'botaie l' metie ch' le traivaiye ! Enne rotte de Jurassiens, emmoïnè poi note J.-Cl. Montavon, lai Rotte di Blîn (le Groupe Bélièr) fait totes souêchetes de còps è D'lémont (en lai Prèfècture), è Bierne (en lai féd'râ Tchaimbre), dains lai vie, meinme è Pairis pe è Bruxelles, po épreuvaie de ch'couere les dgens d' lai polititche.
1963	Enne p'tète rotte de dgens, ces di F.L.J. (Front de libération jurassien), tchoisât lai mâfoûeche po aidgi en s' coitchaint (ç'te rotte détrut, breûle, vangne lai pavou dains tot l' paiyis). Nôs grôsses l' Autoritès, poi ci féd'râ consayie, ci chire Wahlen, s' muse enfin è trovaie qu' 'èl ât temps d' dichcutaie di jurassien probyème, â yûe d' aigongie d' se bairre. L' Raissembyement jurassien ât tot comptant d'aiccoûe, l' U.P.J. tot c'ment l' biernois govèrnement r'fujant lai dichcuchion.
30 d' ôt 1964	An v'lait fêtaie les 50 è 25 ans des des mobyjâchions de 1914 è d' 1939. Ci Virgile Moine è l' féd'râ consayie Paul Chaudet dainvînt faire des dichcoués. Malhèyrouj'ment, èls étînt les dous mâchès en l' aiffaire d' lai piaice d' airmes des Fraintches-Montaignes. 8000 Jurassiens les aittendînt vés l' Fritz, les çhòtrainnent, les empâchaint de dire âtche, les mâmoïnaint meinme in pô. L' djoué qu' cheuyé, l' entiere preusse condannè ç' que s' étâit pèssè ès Raindgies, mains tot l' suisse paiyis aïpprené ç' que c' étâit qu' lai jurassienne quèchtion !
1965	Ç't' annèe mairtche in brâ dains lai yutte di jurassien peupye. Dâs mit'naint, l' jurassien probyème d'vînt enne aiffaire des dgens d' lai polititche.
1967	L' cainton d' Bierne tchairdge lai « Commichion des 24 » d' raicodjaie c'ment qu' an peut réjoudre le probyème en réchpèctaint l' biernois drèt aich'bin que ç'tu d' lai Confèdèrâtion. Po l' môment, l' Raissembyement jurassien trove que ç'te Commichion des 24 n' ât p' trop boinne.

1968	Ci Max Petitpierre, qu' feut féd'râ consayie, ât nammè préjideint d' ènne neûve commichion : « lai conféd'râ Commichion des bons offiches po l' Jura » (la Commission confédérée des bons offices pour le Jura). Ci Jean-François Aubert, qu' raicodgè le drèt en l' Univerchitè d' Neûchétè, dait churvoyie qu' tot djueuche bîn d'aivô l' prochède d' seingne-seingnâchion (procédure d'autodétermination).
1969	L' biernois Graind Consaye aidmât les prepojichions d' lai « conféd'râ Commichion des bons offiches po l' Jura ».
1 ^e d' mârs 1970	Les vôtès : l' cainton d' Bierne aicchète les tchaind'g'ments d' lai conchituchion poi 90369 « âye » contre 14086 « nian » è poi 20646 « âye » contre 2216 « nian » dains l' Jura.
1971-1973	È fât trâs ans po réyie l' probyème des chaituts di Jura. Malhèy'roujment, po airraindgie tot l' monde, an dait faire in raidjout d' lai conchituchion (additif constitutionnel).
23 de djuîn 1974	Poi 36802 « âye » contre 34057 « nian », les vôtaints di cainton d' Bierne aidmâtant in nové cainton : l' cainton di Jura !